

Dithero tsa Tirelano mo Kutlwanong

06/2015 Thero ka Sontaga wa 01 morago moletlo wa go gopola botsalo jwa Morena, e le ka 27. 12. 2015

Mo leineng la Modimo o e leng Rara le Morwa le Mowa o o Boitshepo!

Lefoko le le okamelang beke eno le kwadilwe mo go Joh. 1:14a, le re: "Lefoko la nna nama, la aga mo go rona, ra ba ra bona kgalalelo ya lone."

1. Sefela sa 53 - 53/56

2. **Thapelo:** "Mme nna ke tla nna ke lebelela, ke godisa tumo yotlhe ya gago. Molomo wa me o tla bolela tsa tshiamo ya gago le tsa pholoso ya gago ka metlha yotlhe; gonne ga ke itse palo ya tsona. Ke tla tla ka ditiro tse di thata tsa Morena Modimo, ke tla tumisa thiamo ya gago o le wesi fela," Pes. 71-14-16. Amen.

3. Lefoko la Testamente e kgologolo le kwadilwe mo go Jesaya 49:13-16

Epistolo ka fa thulaganyong ya 2 e kwadilwe mo go 1 Johane 1:1-4;

Efangele ka fa thulaganyong ya 3 e kwadilwe mo go Matheo 2: 13-23.

4. A go ipolelwe tumelo ya bokeresete!

5. Sefela sa 59 - 59/66

6. Thapelo ya mmadi wa thero.

7. **Efangele** ka fa thulaganyong ya 1 e ntšhwa e kwadilwe mo go Luka 2:22-40, e re: "E rile malatsi a phepafatso ya gagwe a sena go feta ka fa molaong wa ga Moše, ba mo isa kwa Jerusalema go mo supa fa pele ga Morena, fela jaaka go kwadilwe mo molaong wa Morena ga tse: 'Mosimane mongwe le mongwe wa maitibolo o tla bidiwa moitshepi wa Morena.' Ba ya go ntsha setlhabelo ka fa go builweng mo molaong wa Morena ka teng, e bong sa 'maphoi a le mabedi, gongwe maebana a le mabedi.' Go ne go le motho mo Jerusalema yo leina la gagwe e leng Simeone; motho yoo a bo a siame, e le mmoifa-Modimo, a lebeletse kgomotso ya Iseraele, mme Mowa o o Boitshepo o le mo go ene. O kile a senolelwa ke Mowa o o Boitshepo gore ga a nke a bona loso, a ise a bone Motlhodiwa wa Morena. A isiwa ke Mowa kwa Tempeleng. Ya re batsadi ba tsisa ngwana Jesu go mo' direla ka fa mokgweng wa molao, a mo tshola ka mabogo, a boka Modimo a re: 'Morena, jaanong o naya motlhanka wa gago tsela, ka fa lefokong la gago, go ya ka kagiso; ka gonne matlho a me a bonye pholoso ya gago e o e etleeditseng mo matlhong a merafe yotlhe, e bong lesedi le le tla senogelang baheitane le go galaletsa morafe wa gago wa Iseraele.' Mme rraagwe le mmaagwe ba gagamalela dilo tse di buiwang ka ga gagwe. Jaanong Simeone a ba tshogofatsa, a raya Maria mmaagwe a re: 'Bona, ngwana yo o beetswe go wa le go tsoga ga ba bantsi mo go Iseraele, le go nna sesupo se se ganediwang. Le wena ka wesi lerumo le tla phunyeletsa mowa wa gago gore megopolo ya dipelo tse dintsi e senolwe.' Le gona ga bo go le Hana moporofeti, morwadia Fanuele, wa lotso lwa ga Asere; yoo a bo a tsfetse thata, mme o ne a tshedile le monna wa gagwe dinyaga tse di supang go tloga mo bokgarebeng jwa gagwe. E ne e le motlholagadi yo o ka nnang dinyaga di le 84, yo o sa tlogeng mo Tempeleng, a direla Modimo ka go itima dijo le ka merapelo bosigo le motshegare. Yoo a tla ka yona nako eo, a leboga Modimo, a bua ka ga gagwe le botlho ba ba lebeletseng kgololo ya Jerusalema. Ya re ba sena go swetsa tsotlhe ka fa molaong wa Morena, ba boela kwa Galelea kwa motseng wa ga bone wa Nasaretha. Ngwana ene a gola, a tia a tlala botlhale, mme tshogofatso ya Modimo e ne e le mo go ene ." Amen.

8. **Thero:** Phuthego e ntle e e ratang mo Moreneng wa rona Jesu Keresete, re setse re fetile mo moletlong wa go gopola botsalo jwa Morena wa rona Jesu Keresete, go ne go le monate go dira moletlo oo gore o nne tshogofatso mo go rotlho. Kajeno re utlwa ka ga ngwana mo tempeleng gore ga diragalang teng. Phuthego e ntle, Jesu e ne e le Mojuda ka fa nameng, a tsalwa a le ka fa tlase ga molao. Paulo a re: "Modimo wa rona Morwa-ona, a belegwa ke mosadi, a nna fa tlase ga molao gore a rekolele ba ba laolwang ke molao, mme re tle re amogele bongwana," mmogo le rona ba merafe e mengwe, re se tlase ga molao ga Bajuda. Josefa le Maria ba ne ba tshogetsa molao, ka nako ba ne ba tlisa Jesu mo tempeleng. Gopola gore se se ntseng jalo go ne go le teng. Molao wa maitibolo wa mosimane o ne wa laolwa ke Modimo. Ka molao oo Baiseraele ba ne ba gopodiwa, fa maitibolo abo ka nako ya go gololwa kwa Egepeto a ne a bolokwa. Ba tlhotlhelediwa ka tseo gore ba ye ba ise ngwana kwa tempeleng gore a bontshiwe fa pele ga Morena.

Phuthego e ntle mo Moreneng, ke kopa mo go lona gore lo buise ka nosi kang ya go phepafadiwa mo go Lef. 12:1-8. Ka fa molaong wa Testamente e kgologolo wa namagadi o ne a kaiwa motho yo o itshekologileng, ya re a sena go bona ngwana. Go ne go batlega nku ya ngwaga, e nne setlhabelo sa phiso, e fiswe gotlho-gotlho. Fa mohumanegi a ne a abela ka lephoi, gongwe leeba. Go go le setlhabelo sa bolele. Leeba la bolawa, la fiswa. Jesu e ne e le setlhabelo sa botlalo sa maleo a rona. Ga re tlhole re tlhoka go ntsha ditlhabelo tse di umakilweng godimo.

Bana ba ga Rre mo Moreneng, Josefa le Maria e ne e le bahumanegi, ba ne ba ntsha ditlhabelo tsa bahumanegi ka letsatsi lele. Maria a phepafadiwa jalo ka fa molaong wa ga Moše. Kgolagano eo ya Testamente e kgologolo ya molao e khutlisitswe kwa Jesu a tlhomileng e ntšhwa ka madi a gagwe teng, ga khutlisiwa le ditlhabelo tsotlhe tsa kgologano e kgologolo, ya re Jesu a neletswe go nna setlhabelo sa botlalo sa boitshepo.

Mo tiragalong ya ga Simeone re bona tiro ya Mowa o o Boitshepo mo pelong ya motho yo o boifang Modimo. Simeone o ne a senolelwa gore ga a nke a bona loso, a ise a bone Motlodiwa wa Morena. Simeone o ne a boifa Modimo. Ee, o ne a lebelela kgomotso ya Iseraele, kgomotso ya rona rotlhe. A nnela mo tsholofelong, fa a tla bona Keresete a ise a swe. Wena o nnela ruri mo tsholofelong efe? A re gopoleng gore ga re a bolelelwa gore Simeone o ne a na le dinyaga tse kae, le e seng gore o ne a agile kae. Mme ka nako, ya re Josefa le Maria ba tliša ngwana mo Jerusalema, Simeone a tlišiwa mo tempeleng ka Mowa, a amogela ngwana Jesu ka go mo tshola ka mabogo, a re: "Morena, jaanong o naya motlhanka wa gago tsela, ka fa lefokong la gago." Mafoko ao a supa gore Simeone o ne a setse a tsofetse. (Le fa go ne go sa kwalwe ka thanolo gore o ne a setse a tsofetse ka nako eo, go amogelwa ke bontsi, fa e ne e le monna yo mogolo ka dinyaga ka nako ele. Ngakho-ke kuyaqhutshwa nentshumayelo ka gore) Fa go ne go setse go fetile dinyaga tse dintsi jalo, a ntse a lebeleletse, a eletsa go bona Keresete. Ya re a sena go bona ngwana a na le dibeke tse di 6, a re: o ka tsamaya a itumetse a re: ke ka ya ka kagiso; "ka gonne matlho a me a bonye pholoso ya gago."

Phuthago ya Morena wa rona Jesu Keresete, Bajuda ba gopotse gore Keresete ke wa bone fela. Ba ne ba sa rate go buswa ke dikgosi tsa merafe tse e seng tsa bagagaabo. Ba re: Ba tla buswa ke setlogolo sa kgosi ya bogologolo, e bong Dafita, mme Simeone o ne a senolelwa ke Mowa o o Boitshepo, a bona gore pholoso e e tlišiwa ke Keresete ga se ya Bajuda fela, mme a re pholoso e e mo go Keresete ke e e etleeditsweng mo matlhong a merafe yotlhe, go sedifasetša yotlhe, le morafe wa ga etsho. Tlhokomela gore pholoso ga e tsamaelane le bontsho gongwe bosweu, e tsamelana le lesedi. Ba ba ntšeng mo maleong ba ntse mo bontshong mo go sa itseng Jesu yo e leng lesedi la botshelo mo go botlhe ba ba mo amogelang. Josefa le Maria ba gakgamala ka tse di builweng ka ngwana wa bone. Modimo o ne wa tlhoma boammaaruri joo mo dipelong tsa bone, fa Ngwana yo o tlišitsweng ke bone mo tempeleng e le Mesia. Ka moo Simeone o ne a ba tšhegofatsa. Se re se lemogang bogolo ka mafoko a a builweng le Josefa le Maria e ne e le polelo ya ga Simeone e e neng e kopantswe bogolo le Maria mmogo le mafoko a a rayang batho ba merafe yotlhe.

Ke nnete Jesu o beetswe go wa le go tsoga ga ba bantsi. Moporofeti Jesaya mo go 8:14-15 o bua ka ga tseo, a re: Jesu o tla nna letlapa le le kgopang le lefika le le digang mo magosing a mabedi a Iseraele. Jesu o tshwana le letlapa le le ketlotsweng, gongwe go baakanyediwa go tšengwa mo felong gongwe, fa le tla tšengwang teng mo kagong. Mme baagi ba ne ba sa le bone, ba le latlha, ba re: Ga le ba thuse. La ba kgopisa, letlapa leo, mme Jesu ka nosi a re: "Lentswe le baagi ba le latlheleng ke lone le le dirilweng letlapa la sekhutlo. Mongwe le mongwe yo o welang mo letlapeng leo o tla thubagana, mme yo le tla mo welang le tla mo tšhwetlakanya," Luka20:17-18. Ba ba kgopisitsweng ka lona ga ba a ka ba wa botlhe. Go teng ba ba bonyeng go tšosiwa ka se se gakgamatsang ka tiro ya ga Jesu Keresete. Ke nnete, lerumo la phunyeletsa mowa wa gagwe. Lefoko leo le ne le raya Maria. Jesu, ba ne ba mmetsa, ba mo apola, ba mo kgwela mathe, ba mmogisa, ba mmapelela mo sefapaanong mo gare ga dinokwane tse pedi. Maria o ne a utlwa botlhoko ka go phunyelediwa mo moweng ka lerumo. Maria a utlwa botlhoko mo go maswe ka tse Jesu a di diretsweng, bogolo fa a ne a mmona a pegilwe mo sefapaanong, a swela mo go sona. Maria o ne a rweswa nyatsego ya dinyatsego. Ka letsatsi leo ga fela ditsholofelo mo go Maria, tsa fela le mo barutweng ba ga Jesu.

Phuthago e ntle mo Moreneng, motho ga a ka ke a sinosa megopolo ka motho kwa ntle ga Jesu. Ke Jesu fela yo o kgonang go sinosa megopolo ya batho, o itse botlhe. Mafoko a gagwe a phunyeletsa mo teng go pelo ya motho gore motho a gopole le tse a setseng a di lebetse. Lefoko la Modimo le dira fela jalo, ka e le mafoko a ona. "Lefoko la Modimo le a tshela, le a dira, le bogale go feta tšhaka nngwe le nngwe e e magale mabedi; le a phololela, le be le kgaoganye botshelo le mowa le kgaoganye botshelo le mowa le malokololo le moko, le athole dikakanyo le maikutlo a pelo," Baheb. 4:12. Simeone o ne a tšhotlhelodiwa ke Mowa o o Boitshepo, fa a ne a porofetha, o ne a sa iponela tse a di buileng ka thata ya gagwe, le e seng tse a di buileng ka botlhale jo bo kalo.

Phuthago, gape re utlwa mo Efangeleng ya kajeno mafoko a a reng: "Le gona ga bo go le Hana moporofeti, morwadia Fanuele, wa lotso lwa ga Asere; yoo a bo a tsofetse thata, mme o ne a tshedile le monna wa gagwe dinyaga tse di supang go tloga mo bokgarebeng jwa gagwe. E ne e le motlholagadi yo o ka nnang dinyaga di le 84, yo o sa tlogeng mo Tempeleng, a direla Modimo ka go itima dijo le ka merapelo bosigo le motshegare. Yoo a tla ka yona nako eo, a leboga Modimo, a bua ka ga gagwe le botlhe ba ba lebeleletšeng kgololo ya Jerusalema. Ya re ba sena go swetsa tsotlhe ka fa molaong wa Morena, ba boela kwa Galelea kwa motseng wa ga bone wa Nasareth. Ngwana ene a gola, a tia a tla botlhale, mme tšhegofatšo ya Modimo e ne e le mo go ene." Amen

9. **Thapelo:** Modimo, o nthutle go tswa mo bošweng jwa me, ke boletse dikgakgamatšo tsa gago, go fitlhela mo letsatsing la kajeno. O se tlogele, fa ke le yo o tsofetseng, ke le monna-mogolo ke tle ke rerele tsa letsogo le gago mo go ditlogolong tsa me, le tsa thata ya gago mo go botlhe ba ba tlang. Amen.
10. **Thapelo ya Morena:** Rara wa rona yo o mo legodimong ...

Sefela sa 64 - 65/63

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero mo e kwadilwe ke E. Mkhabela, ka ngwaga wa 2014.
Kgatiso le go rongwa ga diritho tseo go tšhegodiwa ke kopano e e bidlwang The Lutheran Heritage Foundation.

